

11/01/1997

Tahniah buat pemimpin Asean

Adam

TARIKH 2 September, 1996, adalah tarikh keramat bagi rumpun Melayu khususnya dalam Asean. Perjanjian damai antara kerajaan Filipina dengan pejuang Moro adalah detik bersejarah yang pasti memberi kesan positif kepada hubungan bangsa serumpun dan agama Islam di rantau ini.

Tamatnya perjuangan bersenjata selama 24 tahun memberi nafas baru kepada penduduk di selatan Filipina. Banyak pihak terbabit dalam usaha mencapai perdamaian ini. Di samping kerajaan Filipina dan pejuang Moro, sejuta tahniah kepada beberapa pemimpin Asean.

Konflik di selatan Filipina secara langsung membabitkan orang Islam rumpun Melayu. Sudah tentu pemimpin negara rumpun Melayu lain di rantau ini ingin melihat perdamaian dapat dicapai secepat mungkin dan berkekalan.

Seperti kenyataan Nur Misuari, perjanjian damai ini belum pasti dapat menghasilkan kemajuan secara berkekalan. Ia masih terlalu rapuh. Saya berpendapat di sinilah perlunya peranan bangsa serumpun mengisi perdamaian itu. Sudah tentu Majlis Perdamaian dan Pembangunan Filipina Selatan (SPCPD) secara bersendirian akan menghadapi jalan sukar bagi mencapai apa yang diharapkan.

Persidangan Pertubuhan Persidangan Islam (OIC) pada 9 Disember lalu di Jakarta secara tidak langsung menyuarakan kesepakatan membantu membangunkan Mindanao.

Dengan sumber begitu besar, OIC mampu berbuat sesuatu untuk saudara seagama di Mindanao. Bagaimanapun Nur Misuari nampaknya lebih mengharap jiran terdekat iaitu Malaysia, Indonesia dan Brunei yang dianggap sahabat Mindanao.

Perdana Menteri, Datuk Seri Dr Mahathir Mohamad, menyarankan syarikat Malaysia melabur dalam industri berintensifkan buruh dan perladangan di Mindanao.

Kehadiran Menteri Besar Terengganu, Tan Sri Wan Mokhtar Ahmad, secara kebetulan di Manila ini sebaik saja perjanjian damai ditangani secara rasmi, adalah sokongan moral bagi pejuang Moro.

Apa yang mengkagumkan kami, walaupun perjanjian damai masih dalam proses tetapi sudah ada anak syarikat kerajaan Terengganu, mengadakan projek usaha sama dengan syarikat diterajui pemimpin Moro.

Kita berharap komitmen bangsa serumpun khasnya dan dunia Islam amnya akan dapat mempertahankan perdamaian ini dan kesejahteraan bagi manusia sejagat.